

Dumonda Tomaschett concernent la dismessa da la glitta e dal rument da las vias

Dapi che l'Ordinaziun da ruments (OPAR; CS 814.600) è vegnida messa en vigur l'onn 2016, exista in'obligaziun d'elavurar la glitta ed il rument da las vias che sa cumponan per gronda part da substanzas mineralas.

Fin oz ha l'Uffizi per la natira e l'ambient tolerà la dismessa da glitta e rument da las vias betg tractads che sa cumponan per gronda part da substanzas mineralas sin deponias. Quai cun l'argument, ch'il stadi da la tecnica per elavurar quests ruments da las vias na saja anc betg sclerì. Cun il process d'elavuraziun na saja er la reutilisaziun da las substanzas mineralas betg adina stada pussaivla en il passà.

Ussa che l'Uffizi federal d'ambient ha fixà il stadi da la tecnica e ch'il process d'elavuraziun è vegnì optimà cuntinuadamain ils ultims onns, pretenda l'Uffizi per la natira e l'ambient a partir dal 1. da schaner 2026 ina dismessa adequata dals ruments da las vias. L'onn 2023 èn vegnidas rimnadas 3224 tonnas glitta da las vias en il chantun Grischun.

La regulaziun na pertutga betg mo il chantun, mabain er las vischnancas cun lur vias. Cun la brev dals 16 d'avrigl 2025 èn las vischnancas vegnidas infurmadas, che:

- ils stabiliments d'allontanament da l'aua (retratga da l'aua or dal rument da las vias) pon vegnir utilisads vinavant en il chantun Grischun,
- ils ruments ston en l'avegnir vegnir transportads ed elavurads suenter l'allontanament da l'aua en in auter chantun, quai che chaschuna custs supplementars per il chantun e las vischnancas.

Las vischnancas ch'èn competentas tenor l'art. 35 al. 1 LCPAmb per la dismessa da la glitta e dal rument da las vias, respectivamain las corporaziuns chantunalas per la gestiun da ruments, pon examinar da realisar en l'avegnir stabiliments d'elavuraziun en il chantun Grischun.

En vista a quests fatgs tschentan las sutsegnadras ed ils sutsegnaders las suandantas dumondas:

1. Na fissi betg stà chaussa dal cusseglier guvernativ competent da prender ina tala decisiun chara per il chantun e per las vischnancas, tant pli perquai che las vischnancas èn responsablas per la dismessa?
2. Resultan en il chantun Grischun avunda glitta e rument da las vias che sa cumponan per gronda part da substanzas mineralas, per construir in stabiliment d'elavuraziun en in lieu central sin territori chantunal? Sche gea, po il chantun s'imaginar da manar quel?
3. Nua datti stabiliments d'allontanament da l'aua en il chantun Grischun e co èn quels organisads?
4. Exista ina segirezza giuridica, ch'ils stabiliments d'allontanament da l'aua regiunals dastgan vegnir manads vinavant?

Cuira, ils 13 da zercladur 2025

Tomaschett, Roffler, Luzio, Beeli, Berther, Berweger, Binkert, Bundi, Collenberg, Crameri, Derungs, Epp, Furger, Gansner, Holzinger-Loretz, Kohler, Lamprecht, Loepfe, Loi, Maissen, Mani, Natter, Righetti, Sax, Sgier, Ulber, von Tschärner, Wieland, Zanetti (Sent), Zanetti (Landquart)